

XARÔMĂW Pê Pahhi Cati

ÿhÿ, ihkàhhôc pijakrut itajê ri me pamã me cupê Ixaher catêjê jô pahhicatêjê to awjarê, na ri ihkàhhôc itajê japyrÿ te **Mam Pahhi Catêjê Jô Kàhhôc** (1 Pahhi Catêjê) me **Hapu na Pahhi Catêjê Jô Kàhhôc** (2 Pahhi Catêjê). Ne ihkàhhôc itajê kam pê Tawi xwÿ kra pê Xarômãw to me pamã awjarê.

Ne hanea ne ihkàhhôc pijakrut itajê nõa te mam pahhi catêjê na ihkàhhôc atajê jÿjarên xà jatujrehanea ne harên. Cwÿrjapê ri ihkàhhôc itajê japyrÿ te **Mam Me Hÿjarên Xà Jô Kàhhôc** (1 Me Hÿjarên Xà) me **Hapu na me Hÿjarên Xà Jô Kàhhôc** (2 Me Hÿjarên Xà).

3

Pê Xarômãw pê pahhi tuw ne cumã amji jahkre pej

1 Pahhi Catêjê 3.5-13

Pê Tawi mã ihkra xÿmre nõ ita haprÿ Xarômãw, ne hÿm tyc jakàn pê haxà kam amji to pahhi. Mã Pahpãm te caxwa ri Xarômãwpimtir kam cumã amji to ipipê, ne cumã amji jarên, quê rÿ mã ampo na cuwÿ, quê ha ihtÿj cumã ampo gô.

Mã Xarômãw cumã:

— Pê ca ampeaj kam inxÿ Tawi caxuw apej.
Ne ampo na mã, pê ca caxuw apej?

He pê ampeaj kam akampa na pê,
 ne ampeaj kam cumã gahkre pej.
 Cwÿrjapê pê ca amji mã to me akwÿ jõ pahhi.
 Ne ipê ihhêj rûm cormã me hõkre nõrepyràac,
 ne cormã ipê ijũpar hamreare.
 Ne ipê ate amji mã me capi itajê to ihmpej jahkre
 kêatre.
 Pom me akwÿ jàhtôti itajêcaxuw
 imã ite amji jahkre pejti gõ.
 Mår wa mehkên na me hahkre pej,
 ne ahna mehcukij,
 ne mempejti na me hahkre pej,
 ne ahna mehcukij,
 ne ajpên pême to caprà,
 ne catyt kam ajpên kam me to ihmpej to ipa,
 ne ma ajpên na me hamã — hane.

Mã Pahpãm mã cute amji jarên xà ita na cumã
 ihkîn, mã cumã:

— Wa ha amã ate amji jahkre pejti gõ,
 nãmri atea amji mã,
 ate amjijahkre pej pê ampo pejti ita capi,
 ne ahna gàhwÿr.
 Na wa ha mehcunea jirôa pê
 amã ate amji jahkre pej gõ.
 Ne hanea ne ate ampo na iwÿr nare ata,
 wa ha itÿj amã cugõ.
 Ne itÿj amã gakràjcatia ne cugõ,
 quê ha mehcunea ihtÿj amji mã me acupa —
 hajÿr.

Ne cute Xarômãw mã ihkrã kre te amji jahkre
pej catia ne hõr. Mã cute amjijahkre pejti.

*Pê Xarômãw ajkam me cahãj pijakrut cukij
1 Pahhi Catêjê 3.16-28*

Mã amcro nõ na me cahãj pijapit xyre atajê
pijakrut nepahhi Xarômãw wýr me cator, cute
mehcukij prãmte. Mã pyxit ita te cumã harkwa
to:

— Ýhỹ pahhiti, wa ikre pyxit peaj kam ajwar
me ikrĩ, mã ajwar me imãme ikra pým. Mã
caxwa ri cupê ihkra tyc, mã to hãm ne cute ipa
kamhir, ne ma ipê ikra impýn. Wa ipimprar ne
tee apu to pijahõr to hahkre, mã ramã xãmte
ihtyctu. Ne ahna apê, wa ite hõmpun, mã
necupê ikra nare, ne ihkra ri — hajýr.

Mã ihnõ ata cumã:

— Quê, ihkraa ri cupê ihtyc, ne ihtĩr ita ri,
ikra — hane.

Ne cormã me ajpên mãn kwýa kam mã pahhi
te harkwa to:

— Ajpên me imã wapo xwahhihti nõ to tẽ —
hajýr. Mã cumã hàpên catê nõ te cumã wapo
xwahhihti pyr ne to tẽ.

Mã pahhi te cumã harkwa to:

— Hã, awryc mã me cumã to ahkrare nõita
tĩar jipõ, ne ita mã hĩkjê gã, ne ita mã hĩkjê gã —
hajýr.

Mã ramã cute me to hipõn xàa kam, mãquêt
inxi te harkwa to:

— Ame to hajýr nare! Gapacta ne me cumã
ihtĩar na agõ, nee ca mehcurannare! — hajýr. Ne
ampo na mã cute harkwa ita to hajýr? Ampeaj
kam cumã ihkra japê na ri.

Mã ihnõ ita te harkwa to:
 — Nee to hõ tekjê nare, wa pa xwỳjê nee to itekjê nare ita kam, gapacta ne me to hipô — hajỹr.

Mã pahhi te cumã hàpên catê mã:
 — Hã, nee to hipôn nare! Por pyjê nõ ihkratĩar na ahwỳ ata mã ca me agõ, nãmri cupêari ahkrare nõ ita nã — hajỹr.

Mã caxuaw Ixaher catêjê kam Xarômãw krã kreti na harên cahkũm pyrentu, mã mehcunea amjimã me hõ pahhi ata cupa. Ne pê Xarômãw ajco Pahpãm te cumã amji jahkre pej jõr xà ata kõt mehkwy cukij, ne mehkên me, mempej to ajcokjê, ne maajpên na me hamã. Pê hanea ne ihkrã kreti kõt mehkwy japackre, ne ajco ihkàhhôc kam me hapackre xà atajê hôc.

5

Pê Xarômãw cute Pahpãm to amji kam me hapac xà jũrkwa xãm

1 Pahhi Catêjê 5-6

Ne pê caku atajêa kam Xarômãw Pahpãm mã kên te ikrepejti xãm, mâr quê kam Pahpãm to me amji kampa. Ne Xarômãw te ikre peaj ton na harkwa, ne me to hàpên catêjê mã:

— Ca ha me cumã pĩ tỳj pit pyxwỳr to mõi, ne kên jakati tỳjti impejtiata to pit mã me hahêr to mõi. Ne wakỳre pràti pê ôr ata to me catia neme to ikre ita xãm. Ne imã me hũrkwa cunea jirõa pê ikre ita peaj na to prãm. Ampo na? Imã Pahpãm kĩan to ihkĩn, na wa ha to hane — hajỹr.

Ne pê cute Pahpãm to amji kam me hapac xà jũrkwa ata na caku xet pê cormã amji jipêj. Ne

pê wakÿre prà tepti pê ôr to pit mǎikre kam me
 ampo atajê cunea jipêj.

Mǎ Pahpǎm te Xarômǎw wÿrharkwa kujahêc
 ne cumǎ:

“Ca ha ampeaj kam ate ikam gapac,
 ne catyt kam ijarkwa kôt apa na,
 wa ha itÿj, pom pê wa apǎm xwÿ pê Tawi mǎ
 ijarkwa to icakôc ita to,
 wa ha amǎicakôc,
 ne Ixaher catêjê cahê na ikrĩ,
 ne jũ caxuw me cupê icator nare” hajÿr.

8

Pahpǎm jǎmcjên xà to ipintuw xà

1 Pahhi Catêjê 8.1-6, 22-30

Pê pĩ po te Pahpǎm jǎmcjên xà ata ampo kà
 te Pahpǎm jÿrkwa ata kamahtwÿ. Mǎ Xarômǎw
 ma Pahpǎm to amji kam hapac xà jÿrkwa mǎ
 tohàr prǎm, por cute kên me ôr to ikre tuw
 xǎm ata wÿr. Ne cute Ixaher catêjê pê prohti
 kam me cupê pahhi catêjê to cuprôn, cute me
 ajpênpar, ne me Pahpǎm jǎmcjên xà ata to me
 ipintuw prǎmte. Mǎ mehcunea Xarômǎw te kên
 te Pahpǎm mǎ hõ pyxwÿr xà ata cuna mǎ me xa
 ne me hõmpu.

Mǎ cute cõjkwa mǎ hũhkra pěr, ne Pahpǎm
 mǎ ihcakôc, ne cumǎ:

— Hàpà, me ijõ Inxũ Cati,
 apê Ixaher catêjê cuneaPǎm Cati,
 ne nee pjê mecõjkwa caxuw jũm hamreare,
 ne apyxit peaj ca ampo cunea to ahimpej.
 Ne amǎ me ikĩnti.

Ne ca ha me akwỳ mã ampo na amji to, ne atỳj
to.
Ne por me hĩcunea to ame akĩn atajê mã,
ca ha ita kam,
pom pê ca inxũ Tawi xwỳ mãampo na amji to
awjahkre ata,
ca ha atỳj imã to.

— Ỡhỹ, Ixaher catêjê Pãm Cati,
ca ha ita kam,
pom pê ca inxũ Tawi xwỳ pê amã hàpên catê mã
ampo na amji to awjahkre ata,
ca ha atỳj imã to.
Quê ha Tawi kra nũ te gũ prya kôt ipa,
ne cute amã ampo na prãm atajê pit ton to ipa
mã impàràpên,
quê ha ihtỳj cupê pahhi.

— Ne ampeaj kam acati,
na quê nee cõjkwa ita acahuc nare,
ne quê ha nee hanea ne ikre itaacadahuc nare
cakrô,
ca atỳj gõtpe me ipupu.
Ne wa ijõ Pahhiti, amã icakôc,
ca atỳj ikampa,
ne caxwa me amcro kam ma gũrkwa ita pupu.
Ampo na? He ca ramã ate atỳj ita ri apu apa na
amji ton.

— Ipê amã ijàpên catê,
wa ita ri hãn ne amã icakôc,
ca atỳj hãn ne ikampa.
Ne quê hãn ne Ixaher catêjê pê me akwỳ ita ri,

gũrkwa ita kam, me amã ihcakôc,
 ca atÿj cõjkwa rũm me kampa.
 Ne atÿj cute mehkên tonatajê to impej,
 ne to tojnõ ne hïcu hiahpuro — hajÿr.

11

*Pê Xarômãw pahpãm cahàc kïn ita to apu amji
 to kên*

1 Pahhi Catêjê 11.1-13; 12.17-20

Ne pê Xarômãw ramã hĩ tÿj tu ne hakràj cati,
 ne ajte amji pê Pahpãm tohapac kêt to mõi. Ne
 pê hũm Tawï xwÿ Pahpãm par pejti ata kaj na
 apu to.

Pê Xarômãw pjê jàhtõa jõi cuprÿ me hikwa. Ne
 pê pyjê jàhtõaatajê, nee ampeaj kam Pahpãm
 tïar kõt ame ipa nare, ne pahpãm cahàckrekà
 kõt pit mã ame ipa. Pê Pahpãm ramã mam
 Ixaher catêjê mã harkwa ta, mãr quênee pyjê
 cahkrit pê Ixaher catêjê nareatajê me, ame
 hikwa nare. Nãmri quê ha me cupêPahpãm
 na mehkwy nare atajême ame hikwa na, quê
 ha cama mehprõi itajê pahpãm cahàc krekà
 wÿr mempjê to apkjê, cupate pê Pahpãm ramã
 me cumã harkwa ta, quê me cupêPahpãm na
 mehkwy cahãj pit me, ame hikwa.

Pê Xarômãw ajte, cute mam me amji kam
 hapac xà kõt, ihprõi to hàhtõa to hàhtõi, ne hanea
 ne pyjê kwÿjàhtõa ne to ihpahàm nõ, pê hũrkwa
 kam mehkrï. Ne mehprõi atajê pëamji kõi me
 Xarômãw to me Pahpãm curê xwÿn, ne pea
 ihwej. Mãmehprõi itajê te amji kõi Pahpãm
 cuna mã Xarômãw te pahpãm cahàckrekà kïn

na me ton, pê hũm Tawi xwỳ Pahpãm kam hapac pejti ata kaj na.

Pê Xarômãw prõ itajê mã kẽn te me hõ pahpãm cahàckrekà itajê mã ahpÿanre na hũrkwa pyxwỳr pa, cute kamamehkĩn prãmte. Ne me hõ pahpãm cahàc krekà atajê te amji kam me hapac xà kėanre, ne mehaprỳ te, Axarot me, Camot me Moroc. Ne pê ajco cute amji to me pahpãm cahàc kėanre krekà itajê cajpuaw prãmte, ihtỳj me ahkrareto me capa, mehtĩr kwỳa kam.

Mã Pahpãm apu Xarômãw kam incryac toin-cryc. Ampo na? Nee hipêr apu Ixahercatêjê Pãm Cati pê Pahpãm jarkwa kõtipa nare, ne mehprõ atajêa kôt apu ipa na ri. Cwỳrjapê ri Pahpãm te cumã harkwa to:

“Ca nee ite amã amji ton xà na,
 pahte ajpẽn par xà ata to amji japackre nare,
 ne nee ite ampo na amã ijarkwa ata par nare.
 Cwỳrjapê wa ha nee amã akra to, meakwỳ mã
 pjê cunea jõ pahhi nare.
 Quê ha me akwỳ kwỳa ajpẽn cuna mã
 mehcuhhê,
 ne me ajpu, ne ihtỳj amji to me ajcokjê.
 Na wa ha me amã pjêjipô,
 mār quê akra pê pjê jĩkjê jõ pahhi,
 ne hĩkjê jõ pahhi ata
 quê ha ajteare mã jũm to ihhimpej” hajỳr.

Xarômãw xwỳ himpej xà picapôn xà

Ne pahhi Xarômãw tyc jirô pê mã ri Canãn jõ pjê to ihhimpej xà ata picapôn, ne kỳj rũm hĩkjê

ata japrỳ pê Ixaher, ne harã mãhĩkjê ata japrỳ te Juta. Ne Juta jô pjê jô pahhi ata pê ri Xarômãw kra, ne Ixaher jô pjê jô pahhi ata pê ri ajtea mã jũm ita.

ERIJ ME ERIXÊW

16

Pê Pahpãm Jarkwa To Me Cumã MEHCAKÔC CATÊJÊ

ÿhÿ, pê Xarômãw tyc jakàn pê ri, pê Ixaher catêjê jakrã te tôxi itajê amji tome ajcapô. Na pê me hakrã te tej itajê amji to me kÿj catêjê, ne kÿj rũm, Krĩrĩtpej jô pjê kam me Hĩpôjajo jô pjê kam me ahtwÿ ne amehkrĩ. Ne cute cormã amji mã me haprỳ to Ixaher catêjê.

Ne me hakrã pijakrut itajê te ri amji to me harã catêjê, neharã mã Juta jô pjê kam amehkrĩ, ne cute amji mã me haprỳ to Juta catêjê. Ne hõtpê me hakrã te tej atajê pĩn Ixaher catêjêjàhtôa ne ma Juta jô pjê wÿr me ipintuw, ne curi me cahê na me xa.

Pê Juta catêjê atajê me cupê Tawi tàmwxwÿ catêjê to pit mã amjimã me hõ pahhi. Mã mehkĩnte kÿj catêjê pê Ixahercatêjê atajê ri amjia kôt, amji pê me hõ pahhi jÿrê, ne ihtÿj pahhi na mehkwỳ pyxwÿ.

Ne me ahna ahtũm nare mã kÿj catêjê pê Ixaher catêjê atajê ma ame Pahpãmca, ne ihtÿj me to hapac kêt to me mõ. Cwÿrjapê ri Pahpãm te mehÿrmã me cumã harkwa to mehcakôc catêjê kujahêc, atajê japrỳ te Eri-jme, Erixêw. Mã cute me cumã, cute mehkên

ton jahpan xà na mehkên mã mehàr to me cumã hũjarên. Ne Pahpãm jarkwa kôt me hỹrmã meicator, ne Pahpãm te to ihkujahêc na me hahkre pej xà caxuw, ihtÿj me cumã Pahpãm carôat kôt ampo na amji to me ipipê to me ipa. Ne ihtÿj me hà caprã ne mehtyc to ihtĩr.

Erij pê Pahpãm jarkwa to ihcakôc catê
1 Pahhi Catêjê 16.29-33; 17.1-24

ÿhÿ, pê caku jàhtôa jirô pê, kÿj rũm pjê jĩkjê ata pê Ixaher jô pjê jô pahhi nã ita japyrÿ pê Acapê, ne pjê to ihhimpej itaa to caku to winti ne ihkôt to ajkrut, ne hũm jirôa pê ihkêanre. Ne Ixaher catêjê kam me cupê pahhi catêjê cuneaajirôa pê ihkêanre.

Pê curi Pahpãm jarkwa to me cumã ihcakôc catênô ita japyrÿ Erij. Ne Pahpãm jarkwa kôt, ma pahhi Acapê wÿr cator, necute cumã harkwa to:

— Acapê, Ixaher catêjê Pãm Cati pê ri quêt Pahpãm tĩar, na waipê cumã ijàpên catê, neimã ihkĩn. Wa ite cumã icakôc, ne ihwÿr pejti, mār quê nee ta nã toiwryc nare, ne nee cũmpêti nã to iwryc nare ita na, ahnaa caku to incrê, ate me akwÿ me, me akên ton xà atajê jahpan xà na. Jirô pê wa ha hipêr ahna ahwÿ, quê ha cormã ta nã to wry — hajÿr. Ne ma tẽ.

Jirô pê mã ri Pahpãm te Erij mã harkwa to:

— Ca ha acato, ne ma pyt cjêj xà wÿr tẽ, ne curia cô jarare nã ajpjê ata ri, ca ha amxu, ne toa ikô. Wa ha awÿr pryjara kujate, quê ha awÿr gô topra, ne amã to garte — hajÿr.

Mã Erij te Pahpãm te ampo na mẽn xà ata na ton, ne ma cô jarare nahãhhuc. Mã pryjara hÿrmã kwÿr me hĩ to pra, ne to cumã harte, iràrame pyt cunea kam, mã cô jarare ata to ikõ. Mã ta nõ wrÿc nare ita kam, cô jarare atacrà. Mã Pahpãm te cumã harkwa to:

— Ca ha ma Xarep jõ krĩ wÿr tẽ, necuria ahtwÿ. Quê ha jũm cahãj pê impjên tyc mã impijapit ata ato ajpa. Wa ramã cute ato hajÿr xà na, ite cumã ijarkwa hyr — hajÿr.

Mã ma Xarep jõ krĩ wÿr tẽ, ne krĩ jõ harkwa na cator me ajkaam, cutejũm pijapit ata pupun, mã apu pĩ to cuprõn to mõ. Mã cute cumã hàkjêr, ne cô na ihwÿr. Mã ma cô wÿr ihteam kam, mã hanea ne cute kwÿr na ihwÿr.

Mã cumã:

— Wa ha ampeaj kam Pahpãm krac ri amã amji jarẽ, ipê ampo xàr hamreare, ne imã kwÿr cuhtom pyxit peaj ne nõ, ne caxuw to impê xàincirre ne xa. Wa caxuw apu pĩ to cuprõn to mõ, wa ha ikra me to amjimã impê, ne mehkrêr hiahpuro. Quê ha hamre, ampo wa ha hipêr me cukrê? Quê ha prãm ajwar me icura — hane.

Mã Erij cumã:

— Nee apu amji na atyc cãmjĩ to hajÿr nare, ne nee apupa nare. Ne gapacta ne ate harên xà ita to. Ne mam ihkwÿto impê, ne ajpên iwÿr to tẽ. Jirô pê mã ca ha cormã akra me amjimã atekjê to. Ampo na? Por Ixaher catêjê Pãm Cati pê Pahhiti ata te imã atohũjarên to hajÿr he: “Quê ha hõtpê gõ kwÿr xôm cjên xà me, to impê xà cuhhê xà kam, amã ihcuhhê ita na, wa ha ahnaa

hipêr me ta nō to wry” hajÿr. Ita na ri cute imã ato hũjarên — hane.

Mã cute Erij par pyrentu, ne ma tẽ ne harkwa kôt ton. Ne ihkra ita me, Erij me, me hàpàn pej ita to cute me putwry jàhtôa. Mã jũ caxuwme cupê me hõ ita jamrenare. Ampo na? Pahpãm jũ mã to, mã hamre to ipa, ne hacpÿa mã hipu to ipa, cute to hũjahkre xà ata na.

Ne amcro nō na cahãj kra xũmreita xà ne ihtyc. Mã inxi te Erij mã harkwa to:

— Hàpà, Pahpãm mã hàpên catê ita! Ampo to mã wa ite? Ca me iwÿr mō, wa ite aracri ikên xà nō ton, mã ca ate hahpan xà na ipê ikra to hy, mã ipê ihtyc? — hajÿr.

Mã Erij cumã:

— Hã, caxi, imã akraitã gō, wa ha Pahhiti pê Inxũ Cati mã ihcajrên — hane. Ne cute ihkra ita pÿn ne ma kÿj pê, hõt xàata wÿr to hàpir, ne hikwa xà kam hir.

Ne cute Pahpãm mã hàkjêr ne cumã:

— Hã, ijō Pahhiti, ampo na mã ate impijapit te imã ijàhhuc xà jōr ne ito ajpa itapê ihkra ita curan? — hajÿr. Ne cute intuw ita jipy amji capô to incrê, ne ampeaj kam Pahpãm mã ihcajrên ne cumã:

— Hã, ijō Inxũ Cati, ca haintuw ita to hacpÿa mã ihtÿr — hajÿr. Mã Pahhiti te Erij te ahna hàhwÿr xà ita na impar, nehacpÿa ne cute intuw ita mã carō kujahêc, mã hacpÿa mã ihtÿr.

Mã Erij te impÿn, ne ma inxi wÿr to mō, ne cumã:

— Hõmpu he, hacpÿa mã akra tÿr, ne quê ha ihtÿjamã amji to ajpa — hane.

Mã cute Erij mã harkwa to:

— Ita caxuw wa ampeaj kam apê Pahpãm mã gápên catê na, ite gahkre pej. Ca atýj Pahpãm jarkwa to acakôc to apa — hajÿr.

18

Pê Erij Ixaher catêjê mã Pahpãm carôt na to ajpê

1 Pahhi Catêjê 18.20-46

²⁰ Pê Pahpãm ta nõ kujahêc nare to cakuto incrê, ne ihkôt to hîkjê. Ampona? Pê nee me Pahpãm jarkwa par nare, ne pahpãm cahàc krekà kôt pit mã me amji kampa na pê. Jirô pê mã ri Pahpãm te cumã ihcakôccatê pê Erij kujahêc, Acapê pê pjê jô pahhi ata wÿr, quê cumã awjarê, mãr quê Carer jô kênti na mehkwy to cuprôn tu ne. Mã ma Erijtê, ne cute pahhi pê Acapê mã hÿjarên.

Mã Acapê te mehkwy pê Ixaher catêjêcunea to cuprôn tu, me pahpãm cahàc krekà pê Paharata mã me hâpên catêjê me, cute Carer jô kênti na me to cuprôn.

²¹ Mã Erij te me hàhtôti atajê mã harkwa to:

— Jũ mã ca ha amji to me gâhtũm ry to, ne amji mã me ipijakrut itajê nõ teamji kam hapac xà nõ capi, ne mehnô pyxit peaj kôt me amji kampa? Quê haPahpãm pê ijô Pahhiti pê Pahpãam to Pahpãm na, taa mã ca ha me hÿnã! Nãmri quê hapahpãm cahàc krekà pê Pahar ata pê pahpãm na, taamã ca ha me hÿnã! — hajÿr.

Mã nee jũm te cumã jũ mãn nare.

²² Mã hipêr me cumã:

— He wa me acatàtkre na, ipê Pahpãm pê ijõ Pahhiti mã ijàpên catê pyxit peaj neijàhhuc. Ne Pahar mã me hàpên catêjê mã ajte me hàhtôa to me hàhtô, ne cute me cwatxênta ne ihkôt xîncwênta.

²³ Hã, ajpên me pryti xũmti to me ajkrut ne me to mō. Quê Pahar mã me hàpên catêjê amji mã mehnō capi, ne mehcura, ne me to ihkryj ne tocxàr xà kam pĩ ata jipy me haxwỳ. Ne nee ajco, ihkrac ri pĩ ata kam me cuhôn nare. Wa ha hanea ne ihnō to hanea ne ihcura, ne to ihkryj, nePahpãm mã to caxàr xà kam pĩ ata jipy haxwỳ, ne nee ihkrac ri cuhôn nare.

²⁴ Ca ha me gō pahhiti pê pahpãm cahàc krekà pê Pahar ata na ahwỳ, jirô pê mã, wa ha hanea ne ijõ Pahpãm pê Pahhiti na ahwỳ. Ne por quê ha mePahpãm nō me pahkampa, ne cuhy kujate, quê ha pĩ ita na cupỳ ne to capaata pê, quê ha quêt Pahpãm peaj — hajỹr.

Mã ipu na amehcuhhêitajê cunea te ita na me amji caxàr, ne me cumã:

— Pom ate harên xà ita na ihkênre nare — hajỹr.

Pê Pahar mã hàpên catêjê cute cuhy kujahêc na tee Pahar wỳ

²⁵ Jirô pê mã ri Erij te Pahar mã me hàpên catêjê mã harkwa to:

— Ampeaj kam me gàhtô, cwỳrjapê ca ha me caa mam me pryti ita nō capi ne mehcura, ne mam me apãm pê me gō pahhiti pê Pahar ata mã me acakôc, ne nee me pĩ jakôtata krac ri me cuhôn nare — hajỹr.

²⁶ Mã cute me pryti ata curan, ne ame ton, ne cute me to caxàr xà ata jipy me haxwỳr.

Ne pea iràràtia na, me hõ pahpām cahàckrekà pē Pahar ata pejti na me harēn kam mehtēm, ne tàkamrỳ cuteme to pyt jàpir to me mō, ne me caràr to:

— Hàpà, me ijõ inxū pē Pahar, me ikampa, pom wa me awỳ ita? Me ijõ pahhiti, me ikampa ne ajpēn cuhy kujate! — hane. Mã nee cute me kam hapacnare. Mã cute me pryti to caxàr xà ata pu na me hàkrun kam mehtēm, mecumã cuhy cator prāmte.

²⁷ Ne cute me hàkruanto ramã me pahkrã jimoc kam pyt to me hajỳr to mō.

Mã Erij te me ahna xwỳ kam ihtēm, ne me cumã harkwa to:

— Ca cormã kyre pē ame acaràr, me acaràr to mehtỳajne — hajỳr. Ne me ahna ahtũm ryre mã hacpỹ ma mã cute me cumãn kamihtēm, ne me cumã harkwa to:

— Me gõ pahhiti pē Pahar ita mã me acaràr to ihtỳaj ne, mār quē me akampa. Mõrmõ cormã apu jũm mã ihcakôc, na ri nee cuteme apar nare. Nare, mõrmõ ma ihkwỳr xà wỳr mō, nare, mõrmõ ma jũ kamihtēm xà ata na tē, nare, mõrmõ ihtỳj nō ne gõr, na ca ha ate mehcujrõn xà na me akrãhhia kam me cumã me acaràr! — hajỳr.

²⁸ Mã mehkrãhhia kam me cumã me caràr, ne cute amji kam me hapac xàa na, ihtỳj wapo xwahhihti to me amji jĩ jakep, ne me hõ kruwxwa to me amjicaxwỳ, ne ajco me amji caprô jaxwỳr to me ipa.

²⁹ Ne cute me caràr tỳj ita to me pyt to mō. Mã nee me hō pahpām cahàc pê Pahar ata te mempar ne me cumã jũ măn nare, ne nee cute me caràr parnare, ne nee jũm par nare. Ne hamre, ramã pyt pec to mōr xà ata kam ri, quêt me Pahpām peaj mã cute me ampo to caxàr xàa kam hàhhuc.

Pê Erij cute cuhy kujahêc na Pahpām wỳ

³⁰ Mã Erij te mehcunea mã hàkjêr to:

— Ajpên me mō, ne me ina ahtipre ne, mār ca ahna me ipupun peaj ne — hajýr. Ne cormã cute ame Pahpām mã ampo to caxàr xà hur ata toimpej kwỳa kam, mã cute ahna me cuprôn.

³¹ Mã cute kên te tōxi atajê japỳn. Ne kên atajê pê ahpỳanre na me hakrà pê Ixaher krate tōxi atajê.

³² Ne Pahpām jarkwa kôt cute ahpỳanre na Ixaher kra atajê na kên te tōxi atajênōr par, Pahpām mã cute ampo to caxàr xà to impej prãmte. Jirô pê mări hōtpê cute ipu na cô mã hahkwỳn to kre ryre.

³³ Ne cute kên jipy pĩ kwỳ jakôt, ne kam pryti jĩ kryj ne hakôt, ne cumã harkwa to:

— Me cô jacjên xà catia nō to me cwat, ne me to hipu, ne pryti jĩ kam mehaxwỳ, ne pĩ kam me haxwỳ, ne me to inco tu ne — hajýr.

³⁴ Mã cute me ton jirô pê, hipêr cute me cumã harkwa to:

— Hipêr kam me cô kwỳ jaxwỳ — hajýr. Mã cute hipêr kam me haxwỳr.

Mã hipêr me cumã:

— Kam me haxwỳr to incrê mã — hane. Mã cute hipêr kam me haxwỳr.

³⁵ Mã kên te tôxi atajê kam prytijĩ ata pĩn, cô ajxwỳ ne tàkamrỳ cute ipu na kre jahkwỳn ata to hipu.

³⁶ Mã pyt pec kam, cute me Pahpãm mã ampo to caxàr xà to me amji pyràcxà ata kam hàhhuc. Mã Erij xãm ne mỗ, ne Pahpãm mã ampo to caxàr xà jĩkjê rũm hàhhuc ne xa, ne Pahpãm mã ihcakôc, ne cumã:

— Hàpà, me ijõ Pahhiti. Por apê Aprãw me, Ixac me, Ixaher pê me apynã atajê jõ Pahpãm. Neita kam me cumã apê Ixaher catêjê jõ Pahpãm na amji to ajpê, ne hanea ne ipê amãijàpên catê na me cumã ito ajpê. Pom ite ampo cunea ton itajê, wa nee amjia kôt ite ton nare, ne garkwa kôt wa ite ton!

³⁷ Ijõ Pahhiti ikampa, mār quê itajê cunea apê ampeaj kam Pahhiti pê Pahpãm na, me gahkre pej, ne caa pê ca, amji wỳr, amji mã mehĩ to apkjê — hajỳr.

³⁸ Me ajkaam mã côjkwa pĩn cuhy pỳm! Ne cute pryti me pĩ to caxàr, nekên to caxàr, ne pjênxôm to caxàr, ne hanea ne cute cô to incrà tu, kre ata kam!

³⁹ Mã mehcunea te me ita pupun, ne hũpate, pjêkam, mehcunea mehkuc to mehpỳm, ne me hũjarên to:

— Côjkwa kam me pajõ Pahhiti ita pê ri Pahpãam to Pahpãm! Côjkwa kamme pajõ Pahhiti ita pê ri Pahpãam to Pahpãm! — hajỳr.

⁴⁰ Mã Erij te me cumã harkwa to:

— Me pahpãm cahàc krekà pê Pahar mã me hàpên catêjê cunea pro, mãr quênee jũ kam jũm pyxit ne ihtêm nare! — hajÿr. Mã cute mehcunea pro, mã ma Erij Quixõ jõ kàj mã nõre wÿr me to mõi, ne curi cute mehcunea jipej.

Pê Erij cute ta kujahêc na Pahpãm wÿ

⁴¹ Mã Erij te Acapê mã harkwa to:

— Ita caxuw gapacta ne tẽ ne apà ne ikõ. Ampo na? He ramã ite ta nõpahtÿjti jàhkrihkrit kam ijapac, mã ajpên mõi! — hajÿr.

⁴² Mã ma Acapê tẽ, hÿr ne hàpàn ne ihkõm prãmte.

Mã ma Erij Carer jõ kënti ata jimoac wÿr cumã hàpên catê me hàpir, ne pjê kam hÿr, ne cute ihkuc to ihkõnkrã catêc ne to jÿ.

⁴³ Jirõ pê mã ri cute cumã hàpên catê mã harkwa to:

— Mõi ne côxwa wÿr rît! — hajÿr.

Mã ma tẽ, ne irît ne hacpÿa necute Erij wÿr amji jaxàr ne cumã:

— Wa nee ite ampo pupun nare — hajÿr.

Mã Erij te ampo pupun xà atawÿr ihkujahêc to xet, mã cute amji jacjên to xet.

⁴⁴ Mã cumã hàpên catê te amji jacjên to xet ita kam ri, cute cumã hũjarên to:

— Wa ite côxwa pĩn ahcakrã nõ incirre pê me hũmre jũhkra pyrãcti incirre jàpir to mõi na hõmpun — hajÿr.

Mã Erij te cumã hàpên catê ata mã:

— Atêm pyrentu, ne Acapê mã awjarê, quê hõ cawrõ jõ kàhà kam jÿ, ne kënti pê to wÿr, mãr quê nee côhtàm cupê pry jahêr nare — hajÿr.

⁴⁵ Mã nee harkwa cràre nare. Ne côjkwa kam awcapàtkô pyrentu, ahcakrà kam. Mã kôc pahtýjti ata cator, ne pahhàjê kypê iwryc nare. Mã Acapê hũjarêan kam Jexer jô krĩ wýr ihteam to tẽ.

⁴⁶ Mã Pahpãm te Erij mã ipicahur xà caxuw, carôt týt jôr. Mã cute Acapê jakren, ne ma mam hamrea kam tẽ, ne mam Jexer jô krĩ mã cator.

19

Erixêw pê Pahpãm jarkwa to ihcakôc catê 1 Pahhi Catêjê 19.15-21

Mã Pahpãm te Carer jô kënti na hõ cuhy kujahêc jirô pê mã, cute Erij mãharkwa hyr ne cumã:

— Amji jaxà ne jũm tuw japry te Erixêw ata japê, mãr quê gaxà kam cupêijarkwa to me cumã ihcakôc catê — hajýr. Mã Erij te amji jaxàr ne Erixêwna cator, ne cumã Pahpãm te harkwa to ihcakôc catê naamji mã capi na harên. Mã Erixêw teimpar, ne ma ihkôt mō.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a